

四庫全書

子部

欽定四庫全書

子部

春明夢餘錄卷二十二

詳校官檢討_臣劉錫五

員外郎_臣牛稔文覆勘

覆校官中書_臣孫梅

校對官助教_臣胡子襄

謄錄舉人_臣李椿

欽定四庫全書

春明夢餘錄卷二十二

吏部左侍郎孫承澤撰

三皇廟

三皇廟在太醫院之北名景惠殿永樂中建前為景咸門門東為神庫西為神厨中奉安伏羲神農黃帝皆南向以勾芒祝融風后力牧氏配以儗貸季鬼臾區天師岐伯俞跗白高少俞少師桐君太乙雷公馬師皇伊尹

神應王扁鵲倉公淳于意張機東廡王叔和華陀皇甫
謐巢元方抱朴子葛洪真人孫思邈藥王韋慈藏啓元
子王冰錢乙朱鉉劉元素張元素李泉朱彥修西廡從
祀歲仲春上甲日

甲屬東方
木取生氣

太常寺題請遣禮部堂上

官行禮太醫院堂上官二員分獻仲秋上甲如之嘉靖
初復建聖濟殿於內以祀先醫春秋祭同三皇而以太
醫官主之二十一年以太醫院廟制湫隘弗稱命展拓
今廟隨從禮官議增從祀僦貸季等二十八人隆慶四

年禮部侍郎王希烈議三皇既祀於帝王廟請罷太醫院祭專遣太醫院官祭先醫不允

南宮奏議臣等稽諸禮曰聖王之制祭祀也法施於民則祀之能禦大災捍大患則祀之非此族也不在祀典蓋聞上古聖神繼天立極開物成務壽世福民其功尤繫於醫伏羲觀天文明歷氣神農嘗百藥制本草黃帝與岐伯問荅而有素問之書醫道蓋昉於此矣周禮小宗伯兆五帝於四郊說

者謂祭以天帝配食以五人帝春以太昊夏以炎
帝季夏以黃帝秋以少昊冬以顓頊然此主於五
方之位未有醫藥之專祀也至於有元自國都以
至郡縣皆立三皇廟於醫者之學如宣聖釋奠禮
太昊伏羲氏以勾芒氏之神配炎帝神農氏以祝
融氏之神配黃帝軒轅氏以風后力牧氏之神配
及黃帝臣俞跗以下十人姓氏載於醫書者從祀
兩廡有司歲春秋二季行事而以醫師主之其臣

虞集有言三聖人之所以惠利生人者不必以醫之一技而求夫為醫之道不上達於三聖人則不足以盡其至聖之能事是其祭雖專為醫而設然徧於郡縣則又不免失之黷矣肆我成祖御宇諏經稽典正名定祀尤以醫道關係民生至重乃即太醫院立廟以崇祀三皇正統間重加修葺聖祖神宗先後一揆咸欲躋斯世斯人於仁壽之域而永貽燕翼之令圖也洪惟皇上膺正凝命上法祖

宗謂修合御藥保和聖體實惟茲所廟制湫隘則
祀典弗稱欲振拓而一新之創矩以盡度備物以
章虔斯其佑享昭假於三皇在天之靈而宣滯保
和以迓乎萬壽無疆之慶臣等敢不祇承德美用
樹宏基臣等切惟廟必有制祀必合法不為畫一
之制則恐襲前時之故轍而無以稱觀瞻不正從
祀之名則恐失醫聖之心傳而無以垂法守臣等
謹將合行規制恭擬上進伏乞裁定施行

都城隍廟

都城隍廟在都城之西永樂中建中為大威靈祠後為
寢祠左右為二司兩廡為十八司前為闕威門外左右
為鐘鼓樓又前為順德門又前為都城隍門廟中有石
刻北平府三大字按洪武二年以周禮有司民之祭封
京師都城隍祭之三年正城隍神號去封爵命春秋從
祀於山川壇三十年改建廟詔劉三吾曰朕設京師城
隍俾統各府州縣之神以監察民之善惡而禍福之俾

幽明舉不得僥倖而免其書所由於石二十一年復以從祀大祀殿罷山川壇奉祭惟仲秋祭嘉靖九年罷山川壇從祀歲仲秋月遣太常官祭

城隍之名見於易若廟祀則莫究其始唐李陽冰謂城隍神祀典無之惟吳越有爾宋趙與時辯其非以為成都城隍祠太和中李德裕建李白作章鄂州碑有城隍祠又杜牧刺黃州韓愈刺潮州趙信陵刺舒州皆有城隍之祭則不獨吳越然矣而

蕪湖城隍祠建於吳赤烏二年則又不獨唐而已
記曰天子大蜡八伊耆氏始為蜡注曰伊耆氏堯
也蓋蜡祭八神水庸居七水則隍也庸則城也此
正城隍之祭之始春秋傳鄭災祈於四鄰宋災用
馬於四鄰皆其證也庸字不同古通用耳由是觀
之城隍之祭蓋始於堯矣

漢壽亭侯廟

漢壽亭侯廟在宛平縣東成化十三年建俗呼白馬廟

蓋隋之舊基也每歲五月十三日遣太常官致祭按洪武二十八年建廟於鷄鳴山祭漢壽亭侯永樂中始載祀典

公於後主景耀三年追謚壯繆侯宋徽宗崇寧元年追封忠直公大觀二年加封武安王宣和五年勅封義勇武安王高宗建炎二年加封壯繆義勇王淳熙十四年加封英濟王勅曰生立大節與天地以並傳沒為神明亘古今而不朽荆門軍當陽

縣列神壯繆義勇武安王名著史冊功存生民一
方所依千載如在凡有禱於水旱雨暘之際若或
見於煮蒿悽愴之間英烈巖巖可畏而仰廟貌奕
奕雖遠益新爰啟王封仍加美號豈特顯爾神威
德之盛亦以慰此邦父老之情尚祈靈助服我休
顯可特封壯繆義勇武安英濟王奉勅如右牒行
淳熙十五年十一月二十一日萬歷四十二年秋
奉勅晉封三界伏魔大帝神威遠震天尊闡聖帝

真君雲長本字長生雲長其別字也公忠貫一時
氣蓋千古封之為王豈公之志至曰真君益不可
聞於公也明翰林焦竑正陽門廟碑文曰正陽門
廟者祀漢前將軍關侯作也侯廟祀徧天下而稱
正陽門者為都城作也侯名在百世封號在累朝
而稱漢前將軍者侯志也斯得之矣

宋司馬智玉泉寺壽亭侯印記紹興中洞庭漁人
獲壽亭侯印競以為金報於官納長沙庫中時有

光燭吏不敢留移文公安送還侯廟印徑二寸其制甚古印鈕有連環四面兩相貫上有一大環總之所以佩也淳熙四年冬元庵真慈募畫印狀具本末將獻於東宮是夕印留方丈光發於玉輝燭楹廡寺有仁宗皇帝所賜龍眉龍角二物宜與印同藏名山永為鎮寶焉予與元庵為方外遊遠訪靈跡悉所經見故得而詳之據此則公固壽亭也嘉靖十年南太常少卿黃芳以漢壽封邑而亭侯

者爵也止稱壽亭侯誤矣乃改稱漢前將軍漢壽亭侯關前將軍贊嗚呼篡漢者瞞也成瞞篡者權也瞞名漢臣也實漢賊也權陽瞞敵也陰瞞翼也公批亢於前而不虞姦於腋七軍甫淹六師隨厄使永安之恨不在許昌而在公安建興之師不出樊城而出祁山安樂之牋與歸命之璧而相後先惜哉雖然不以間關而廢兄弟不以亂離而廢君臣其峙如者山嶽澄如者川流而炳如者日月星

辰嗚呼此其所以亘萬古而猶神也耶

宋丞相文信國祠

宋丞相文信國祠在郡學西乃元之柴市公授命所永樂六年太常博士劉履節奉命正祀典謂天祥忠於宋室而燕京乃其死節之所請祠祀從之祠堂三楹前為門又前為大門祠之西為懷忠會館江右士夫歲時集會於此以祭公者也宣德四年保定李庸為府尹重拓其祠信國所著有日錄吟嘯集指南錄集杜二百首並

刊板祠中

元人王惲云至正十一年十二月十四日國兵自陽邏泆渡江明年十二月臨安降度宗二庶子為陳宜中文天祥張世傑擁入許浦江口時有黑龍見因改號景炎十六年為帥臣張弘範滅於崖山口執文天祥至大都囚之上屢欲赦出相之竟不從十九年十二月初九日戮於燕南城柴市

元人吳萊曰頃予嘗從鄉先生學見福唐劉汝鈞

貽書括蒼吳思齊子善論文丞相宋瑞事云自江
西初起時崎嶇山谷購募義徒畛田洞丁造轅門
請甲仗不啻數萬而尹玉實為驍將文衣冠指麾
衆皆詣闕感泣求死已而當國二揆交沮用兵師
無宣諭卒無犒賞盤桓月餘僅令守姑蘇一路張
彥提重兵居毘陵且有叛志尹玉竟以絕太湖弔
橋首尾不救而溺死未幾獨松告急朝廷四詔政
府六書趣奔聊攝援根本一日一夜倉皇就道及

至行都而獨松隨已破陷復令駐兵餘杭守獨松
朝議不一衆心離散會有尹京之命餘慶遽奪其
印不與漢輔遁德剛遁北軍入城與權又絕江遁
乃即日拜樞使又拜右揆補與權處且令往軍前
講解毅然請行及被囚以北中道奔迸收集亡散
無兵無糧天下大勢去矣帝霸交馳正偽更作是
不一姓當世之為大臣元老者視易姓如閱傳郵
况當滄海橫流之際而彼乃以異姓未深得朝廷

事權欲隻手障之至死不屈微箕二子且有愧色
於宗國矣其書大略如此趙弼作文山傳云公既
赴義其日大風揚沙天地晝晦咫尺不辨城門盡
閉自此連日陰晦宮中皆秉燭而行羣臣入朝亦
焚炬前導世祖問張真人而悔之贈公特進金紫
光祿大夫太保中書平章政事廬陵郡公謚忠武
命王積翁書神主灑掃柴市設壇以祀之丞相博
羅行初奠禮忽狂飈旋地而起吹沙滾石不能啟

目俄捲其神主於雲霄中隱隱雷鳴如怨之聲天
色愈暗乃改前宋少保右丞相信國公天俄開霽
元人鄧剡贊目煌煌兮疎星曉寒氣英英兮晴雷
殷山頭碎柱兮壁完血化碧兮心丹嗚呼孰謂斯
人不在世間

明大學士楊士奇重修文丞相祠記孟子曰我知
言我善養吾浩然之氣知言者盡心知性而有以
究極天下之理浩然之氣即天地之正氣具於吾

身至大而不可屈撓者知之至養之充而後足以
任天下之大事天下之事莫大於君父文丞相甫
冠奉廷對即極口論國家大計未幾元兵渡江又
上書乞斬嬖近之主遷幸議者以一人心安社稷
固已氣蓋天下矣自是而斷斷焉殫力竭謀扶顛
持危以興復為己任雖險阻艱難百挫千折有進
而無退不幸國亡身執而大義愈明蓋公志正而
才廣識遠而器闊浩然之氣以為之主而卒之其

志弗遂者蓋以天命去宋也雖天命去宋而天理在公必不可已故宋亡其臣之殺身成仁者不少論者必以公為稱首公事具宋史而公鄉人劉岳申撫公所著日錄吟嘯集指南錄集杜二百首及宋禮部郎官鄧光薦所述督府忠義傳以作公傳視史加詳實焉北京之有公祠洪武九年前北平按察副使劉崧始建於教忠坊今順天府學之右而作塑像焉永樂六年太常博士劉履節奉命正

祀典始有春秋之祭於有司歲以順天府尹行事
宣德四年府尹李庸始至謁公祠下顧瞻祠宇敝
陋弗稱遵用詔旨葺而新之凡祀神之器靡不備
具又求劉傳刻石將使人人皆知世之為臣者先
明震動焜焜烈烈有公也於戲忠孝人道之大節
治化所先而崇禮先賢表勵後人尤守令之急務
庸其達為政之本與庸字執中保定唐縣人寬厚
明敏自太學生授工科給事中上親擢為順天府

尹愛人之心剝繁之才上下皆稱之而盡心學校
敬賢尚德如飾昌平之狄梁公劉諫議祠而嚴其
祀事之類皆其知本之務皆可書也因並書之以
示來者

明韓雍請謚宋臣文天祥謝枋得疏竊見宋丞相
少保信國公文天祥弱冠狀元立朝盡節臨危拜
相許國不疑志專恢復屢挫折而不移心切匡時
蹈艱危而不變既而國亡被執繫獄累年誘之以

大用而不從脇之以刀鋸而不屈卒之南向再拜
殺身成仁收三百年養士之功立千萬載為臣之
極有指南錄以著其忠愛有集杜詩以寄其憂傷
其精忠大節與日月爭光與天地悠久誠足以正
人心而扶世道也及宋禮部侍郎謝枋得登科對
策力詆權奸發策漕司極攻時政受任於運去祚
移之後抗敵於兵罷民散之餘力已盡而不支志
有為而不果後元臣程文海等交章累薦耻仕二

姓懇辭不屈叅政魏天祐強逼北行誓死不食終
於燕京著為文章高邁奇絕發明道學羽翼聖經
其清論無愧於先賢有功於後學文天祥江西廬
陵縣人謝枋得江西上饒縣人二賢歿後贈謚未
加子孫有在錄用未及及順天府府學之西舊有
文天祥祠堂塑像尚具儒者衣巾未復丞相冠服
皆為缺典臣切惟伯夷叔齊死於殷周之際至宋
而追封之諸葛亮顏真卿忠於漢唐之時至元而

加封之古之君天下者若茲所行蓋有所見而非
苟焉無益之舉也如蒙准言乞勅禮部翰林院儒
臣會同考議量加文天祥謝枋得贈謚取其子孫
量才錄用并將順天府學之西文天祥祠堂塑像
改塑丞相冠服行令有司仍各春秋祭祀庶使天
下之人知為臣而能死忠死節者雖百世之後亦
得暴白顯揚垂休後嗣以增志士仁人之氣沮亂
臣賊子之心其於綱常誠非小補

附載

宋遺臣謝公枋得至燕死於憫忠寺按謝公為福
建叅知政事魏天祐強之北行自離嘉興輒不食
二十餘日不死乃復食比至燕居憫忠寺問太后
及瀛國公所在再拜慟哭疾甚留夢炎使醫將藥
雜米飲進之怒擲於地不食五日死子定子護骸
骨歸燕京少公一祠

張千載字毅甫文公友也隨公至燕僦居公寓小

樓之傍日以美食進之公既受刑潛造一櫝藏其
首訪歐陽夫人於俘虜中得其尸火之拾骨並櫝
南歸付其家張公宜附祀祠中

汪元量亦來大都居公囚所每日作詩相倡和元
量善鼓琴世祖命奏琴喜之因力求去賜為黃冠
師人贈之以詩云三日錢塘水不波子嬰繫組納
山河兵臨魯國猶絃誦客過殷墟獨嘯歌鉄馬渡
江功赫奕銅人辭漢泪滂沱知章喜得黃冠賜野

水閒雲一釣蓑

謝翱曾以布衣杖策叅信國軍事未幾善哭如唐
衢過姑蘇望夫差之臺慟哭終日過勾踐行禹窰
間北嚮哭乘舟至鄞過蛟門登候潮山感夫子浮
海之歎則又哭晚登子陵西臺以竹如意擊石歌
招魂之詞歌闋竹石俱碎失聲哭

趙孟頫宋之宗室年十七文丞相辟為叅謀文北去
居吳依親友以居越十年為道士名道淵居松江北

道堂又五年為僧名順昌因自名三教遺逸改道堂
為本一庵臨終手詞以訣有曰文山之客千古忠貞
于少保忠肅祠

于少保忠肅祠在崇文門內東裱背巷公故賜宅也祠
三楹祀少保兵部尚書于謙塑公像危坐歲春秋遣太
常等官致祭

公被刑於天順元年復官於成化二年賜諡肅愍
於弘治三年改諡忠肅於萬歷十八年

公被刑日陰靈翳天京師婦孺無不灑泣夫人流
山海關夜夢公曰吾形殊而魂不亂獨兩目黥然
借汝眼光見形於皇帝次日夫人目失明會皇極
門災英宗臨視公現形火光中上悚然知公冤詔
放夫人歸眼明如故

當時殺公誣以迎立外藩王文極口辨公但云召
親王非金符不可符在何必辯時印綬監諸璫檢
閱各府金符俱在獨無襄府者驚懼欲死問一退

閑老監云是宣廟上賓時老娘娘以國有長君社稷之福欲召襄王取入三楊議不合而止符留後宮老娘娘張太后也於是啟而得之符在暖閣塵積寸餘矣

公之養子于廉好聚書畫天順中自邊赦還坐裱背衙衙見負畫售者忠肅夫婦像在焉蓋公家與內臣盧永同時籍沒盧尋宥給還籍物而畫像誤還盧所持以出售廉乃負之歸錢塘

公之改謚撫臣傅孟春疏請宗伯于慎行題覆者
也先是傳疏未入少宗伯黃鳳翔夢一偉男子持
書來有空山孤魂之句覺而惡之詰晨接傳疏乃
悟夜夢者公也生氣不泯如此

李薦祭東坡文云皇天后土鑒生平忠義之心名
山大川還萬古英靈之氣後追錄坡公制詞中全
用之憲宗朝追錄于少保亦全用此語尤確

陳繼儒云土木之變裕陵北狩公痛哭抗疏止南

遷之議召勤王之師額森擁帝至大同至宣府至
京城下皆登城謝曰賴天地宗社之靈國有君矣
此一見左傳楚人伏兵車執宋公以伐宋公子目
夷令宋人應之曰賴宗社之神靈吾國已有君矣
楚人知雖執宋公猶不能得宋國於是釋宋公又
一見廉頗傳秦王逼趙王會澠池廉頗送至境曰
王行度道里會遇之禮畢還不過三十日不還則
請立太子為王以絕秦望又再見王旦傳契丹犯

邊帝幸潭州旦曰十日之內未有捷報當何如帝
嘿然良久曰立皇太子三者公讀書得力處也

春明夢餘錄卷二十二

欽定四庫全書

春明夢餘錄卷二十三

吏部左侍郎孫承澤撰

內閣一

大學士直舍所謂內閣也在午門內東南隅外門西向
閣南向入門一小坊上懸聖諭過坊即閣也初制規模
甚狹嘉靖十六年命工匠相度以文淵閣中一間恭設
孔聖暨四配像旁四間各相間隔而開戶於南以為閣

臣辦事之所閣東誥敕房裝為小樓以貯書籍閣西制
敕房南面隙地添造捲棚三間以處各官書辦而閣制
始備其職掌入內閣預機務出納帝命率遵祖憲奉陳
規誨獻告謨猷點簡題奏擬議批答以備顧問平庶政
不得專制九卿事九卿奏事亦不得相關白凡上所下
一曰詔二曰誥三曰制四曰敕五曰冊文六曰諭七曰
書八曰符九曰令十曰檄凡下所上一曰題二曰奏啓
三曰表箋四曰講章五曰書狀六曰文冊七曰揭帖八

曰會議九曰露布十曰譯皆審署而調劑焉平允乃行之凡東宮出閣講讀領其事叙其官而授之職掌凡修實錄史志諸書充總裁官寔錄成呈上焚其草禁中凡宗室請名請封及諸臣請諡並擬上焉凡圖書繕寫讐較皆課而察之凡郊祀巡狩親征扈行凡累朝御筆實錄寶訓玉牒之副古今書皆籍而藏之凡會敕稽其由狀而叙述上請焉凡禮部會試廷試貢生國子生月課歲貢生廷試譯館譯生皆總領之其屬制敕房書辦制

敕詔旨誥命冊表寶文玉牒講章碑碣題奏揭帖一應
機密文書及王府敕符底簿誥敕房書辦文官誥敕番
譯敕書並譯書揭帖紀功勘合皆稽按典故起草進呈
若漏洩稽緩遺失妄誤皆有罰凡入內閣曰直文淵閣
官至三殿二閣二坊大學士無入內閣者不得與機務
雖編修贊善等官有入內閣者亦得預機務

閣門聖諭

機密重地一應官員閑雜人等不許擅入違者治

罪不饒

宣德御製箴廷有司言自周則然後世襲用愈密
而重策命所出講學所資幾務之嚴于度于咨代
有賢哲博聞明識克勵翼之用光厥職咨爾儒臣
朝夕左右必端乃志必慎乃守啟沃之言惟義與
仁堯舜之道鄒孟以陳詞尚典實浮薄是戒謀議
所屬出處乎外心存大公固役於私昔人四禁汝
惟勵之獻納論思以匡以益以匹前休欽哉無斁

文淵閣落成駕幸視謝表具官臣楊榮等茲者欽
蒙聖駕臨幸文淵閣周視臣等寓直之所特頒恩
命增益室宇兼賜飲饌器用周悉備至聖恩廣大
感戴惟深謹上表稱謝者臣等誠懼誠忤稽首頓
首上言伏以日月光華當大聖龍興之運車書混
一正文明天啟之時鑒御幸臨儒紳遭遇恭惟皇
帝陛下聖神天錫剛健日新典章法度之弘脩功
成理定華夏蠻貊之率俾近說遠來萬幾餘閒怡

神稽古六龍捧御寵顧延英上深軫於天心頗垂
矜於寒士廣其室宇遂涼燠之攸宜給以饗殮兼
什器之咸備凡百所用靡一弗周同乾坤覆載之
恩踰父母生成之賜是皆皇上聖仁廣大明睿照
臨溥德澤於萬方施由侍從昭禮文於千載高出
古今所以致海宇之雍熙所以隆皇圖於永久臣
等深慚末學幸際明時被沐恩榮匪名言之可罄
策勵篤鈍豈報效之敢忘端秉寅誠恭陳申謝龍

翔鳳翥瞻五彩於中天春育海涵祝萬年之聖壽
列輔起家考

洪武九年先置中書省十五年始置殿閣胡惟庸
以上俱中書省

李善長

徐達

俱胡運
勲佐

汪廣洋

今史

胡惟庸

寧國縣
知縣

吳沉

待制

吳伯宗

禮部員外名
祐以字行

宋訥

助教

劉仲質

宜春縣
訓導

朱善

豐城縣訓導

按十五年徵耆儒鮑恂全思誠余詮張紳張長年
詣闕俱命授文華殿大學士固辭僅列銜未入閣
故不載

永樂七人

解縉

中書庶吉士

黃淮

中書

胡廣

修撰

楊榮

編修

楊士奇

吳府審理名
寓以字行

金幼孜

給事中名
善以字行

胡儼

華亭縣教諭鄉科

洪熙五人

楊榮

見前

黃淮

見前

楊士奇

見前

金幼孜

見前

權謹

樂安縣知縣

宣德五人

楊榮

見前

金幼孜

見前

楊溥

編修

張瑛

寧州訓導

陳山

奉化縣教諭鄉科

正統八人

楊榮

見前

楊溥

見前

陳循

修撰

曹鼐

修撰

馬愉

修撰

苗衷

編修

高穀

庶吉士

張益

庶吉士

景泰九人

陳循

見前

高穀

見前

彭時 修撰

商輅 修撰

俞綱 郎府審理

江淵 編修

王一寧 吏部主事

蕭鎡 編修

王文 御史

天順八人

彭時 見前

徐有貞 庶吉士

許彬 庶吉士

薛瑄 御史

李賢 吏部主事

呂原 編修

岳正 編修

陳文 編修

成化十人

彭時 見前

李賢 見前

陳文 見前

商輅 見前

萬安 庶吉士

劉定之 編修

劉珣 庶吉士

劉吉 庶吉士

彭華 庶吉士

尹直 庶吉士

弘治六人

劉吉

見前

徐溥

編修

劉健

庶吉士

邱濬

庶吉士

李東陽

庶吉士

謝遷

修撰

正德十四人

李東陽

見前

謝遷

見前

焦芳

庶吉士

王鏊

編修

楊廷和

庶吉士

劉宇

上海縣知縣

曹元

工部主事

劉忠

庶吉士

梁儲

庶吉士

費宏

修撰

靳貴

編修

楊一清

中書

蔣冕

庶吉士

毛紀

庶吉士

嘉靖二十七人

楊廷和

見前

費宏

見前

蔣冕

見前

毛紀

見前

楊一清

見前

謝遷

見前

袁宗臯

與府長史弘治庚戌進士

石瑤

庶吉士

賈詠

庶吉士

翟鑒

庶吉士

張孚敬

南刑部主事原名璉

桂萼

丹徒縣知縣

方獻夫

庶吉士

李時

庶吉士

夏言

行人

顧鼎臣

修撰

嚴嵩

庶吉士

許讚

大名府推官

張璧

庶吉士

張治

庶吉士

李本

庶吉士

徐階

編修

袁煒

編修

嚴訥

庶吉士

李春芳 修撰

郭朴 編修

高拱 庶吉士

隆慶八人

徐階 見前

李春芳 見前

高拱 見前

陳以勤 庶吉士

張居正 庶吉士

趙貞吉 庶吉士

殷士儋 庶吉士

高儀 庶吉士

萬歷二十人

張居正

見前

呂調陽

編修

馬自強

庶吉士

張四維

庶吉士

余有丁

編修

申時行

修撰

王錫爵

編修

許國

庶吉士

王家屏

庶吉士

陳于陞

庶吉士

趙志臯

編修

張位

庶吉士

沈一貫

庶吉士

朱賡

庶吉士

沈鯉

庶吉士

于慎行

庶吉士

李廷機

編修

葉向高

庶吉士

吳道南

編修

方從哲

庶吉士

泰昌三人

方從哲

見前

劉一燝

庶吉士

韓爌

庶吉士

天啟二十一人

方從哲

見前

劉一燝

見前

韓爌

見前

葉向高

見前

何宗彥

士庶吉

孫承宗

編修

沈澶

士庶吉

孫如游

士庶吉

史繼偕

士庶吉

周如磐

士庶吉

丁紹軾

士庶吉

朱國禎

士庶吉

朱國祚

修撰

朱延禧

士庶吉

魏廣徵

士庶吉

馮銓

士庶吉

顧秉謙

士庶吉

黃立極

士庶吉

張瑞圖

編修

李國楷

士庶吉

施鳳來 編修

崇禎五十人

韓爌 見前

孫承宗 見前

黃立極 見前

張瑞圖 見前

李國櫓 見前

施鳳來 見前

來宗道 庶吉士

楊景成 庶吉士

李標 庶吉士

劉鴻訓 庶吉士

周道登 庶吉士

錢龍錫 庶吉士

成基命

庶吉士字靖之以字行

周延儒

修撰

何如寵

庶吉士

錢象坤

庶吉士

溫體仁

庶吉士

吳宗達

編修

鄭以偉

庶吉士

徐光啓

庶吉士

錢士升

修撰

王應熊

庶吉士

何吾騶

庶吉士

文震孟

修撰

張至發

知縣

林鈞

編修

孔貞運

編修

黃士俊

修撰

賀逢聖

編修

傅冠

編修

劉宇亮

庶吉士

薛國觀

推官

楊嗣昌

教授

程國祥

知縣

方逢年

編修

蔡國用

中書

范復粹

推官

姚明恭

庶吉士

張四知

庶吉士

魏炤乘

知縣

謝陞

知縣

陳演

庶吉士

蔣德璟

庶吉士

黃景昉

庶吉士

吳姓

知縣

魏藻德

修撰

李建泰

庶吉士

方岳貢

主事

范景文

推官

邱瑜

庶吉士

文淵典故

洪武元年改中書省左右相國為左右丞相左右

丞各一人叅知政事二人以宣國公李善長為左

丞相兼少師統六部事三年召山西叅政楊憲為

右丞相陝西叅政汪廣洋為左丞已善長封韓國

公進太師廣洋封護軍忠勤伯後以胡惟庸敗善
長等皆坐累上御奉天殿敕文武羣臣言自古三
公論道六卿分職自秦始置丞相而亡漢唐宋因
之雖有賢相然多小人專權亂政自今罷相設五
府六部都察院通政司大理寺分理天下庶務彼
此頡頏不敢相壓事皆朝廷總之以後嗣君不許
立丞相臣下敢有奏請設者文武羣臣即時劾奏
處以重刑命翰林春坊官入看詳諸司奏啟平駁

之平允則列名封進署曰翰林院兼平駁諸司文
章某官某進其時召耆儒鮑恂張長年俞銓至命
為文華殿大學士三人辭不就而命吏部尚書邵
質檢討吳伯宗為華蓋武英殿大學士翰林學士
宋訥典籍吳沉為文淵閣東閣大學士皆侍左右
備顧問然不得平章軍國事永樂入踐極始開內
閣於東角門簡翰林待詔解縉為侍讀中書舍人
黃淮王府審理楊士奇為編修進修撰胡廣為侍

請編修楊榮為修撰戶科給事中金幼孜桐城縣
知縣胡儼為檢討入直文淵閣諸六部大政咸共
平章秩五品而恩禮賜賚與尚書等至洪熙初設
謹身殿大學士既又建弘文閣諭大臣曰卿等各
有職務朕欲得學行端謹老儒數人日侍燕閑備
顧問可咨訪以聞楊士奇等以翰林侍講王進蘇
州儒士陳繼對命學士傳旨繼授五經博士掌閣
事進佐之尚書蹇義舉學錄楊敬訓導何澄敦實

即授敬編修澄給事中皆直弘文閣於是華蓋謹身武英三殿及文淵閣東閣俱有大學士

永樂初建內閣於東閣門內以解縉等七人在閣辦事以備顧問永樂之世楊士奇楊榮官止五品是時尚沿國初之舊至仁宗朝陞士奇為禮部侍郎尋加少保轉少傅兼華蓋殿大學士榮為太常卿進太子少傅兼謹身殿學士溥為太常卿兼翰林學士蓋以東宮舊恩非例也後楊榮陞尚書授

以工部蓋不欲以兼官壓六卿之上楊溥丁憂起復不入閣宣德間以九年考滿陞禮部尚書至英宗時復命入閣故宣德以前內閣與外九卿為平交執禮持法不相顧忌宣德以後三楊眷重漸柄朝政英宗以九歲登極凡事啟太后太后避專令內閣議行此內閣票旨之所由始也及楊榮卒於正統五年楊士奇卒於正統九年楊溥卒於正統十一年則漸改於其舊及景泰易儲之後雖天子

亦藉內閣以為已用但其官品如蕭鎡江淵許彬
王一寧商輅等皆不脫學士之銜天順初李賢始
以兵部侍郎陞吏部尚書兼翰林學士入閣薛瑄
由大理卿陞禮部侍郎兼翰林學士入閣成化弘
治多由侍郎陞尚書入閣若先陞尚書則無入閣
之命至正德初劉瑾以其私人焦芳吏部尚書入
閣蓋以外寮之首而入主中秘之權至張孚敬張
居正則直以相體自尊危坐諸卿之上而名委之

然兩文忠雖好高不懼絕利一源乃其具美

閣員初無定額洪武初吳伯宗以武英殿大學士
復為翰林院檢討永樂初王文忠以庶吉士入翰
林未幾召同王直入內閣書機宜奏疏五年陞脩
撰十四年進侍講入閣在先授官在後嗣後始以
翰林院銜直文淵閣然惟胡文穆靖修撰楊文敏
榮編修彭文憲時商文毅輅以修撰其他黃文簡
淮以中書舍人楊文貞士奇以齊王府審理副陳

汝靜敬宗張子玉瑛以鄉舉金文靖幼孜以給事
中胡若思儼以桐城知縣俞綱以審理權謹以光
祿署丞徐武功有貞以都御史李文達賢以主事
王毅愍文薛文清瑄以御史高文義穀以中書舍
人劉宇曹元以知縣袁榮襄宗舉以長史楊文襄
一清以總督張文忠璉方獻夫桂萼二文襄霍文
敏韜以主事席文襄書以戶侍許文簡讚以吏書
夏文愍言以給事中皆不由館選自茲會推內閣

冢宰掌院必列名至崇禎朝遂定為故事每次枚
卜必內外兼推

初設內閣楊文貞士奇歷二十三年官止五品後
加至少師止兼兵部尚書華蓋殿三官時褫忠定
義以少師為冢宰朝廷不欲文貞班居其上以存
冢宰之體也陳芳洲循雖兼五官亦止戶部尚書
後李文達賢以吏侍領吏部尚書而彭文憲時商
文毅輅萬安相繼領吏部尚書自後遂為首輔故

事

內閣外出者永樂中解縉為廣西叅議胡儼為國
子祭酒宣德中張瑛陳山以干請諸司改瑛為南
禮部山專教內書堂景泰中江淵出為工部尚書
俞綱出佐兵部許彬出為陝西叅議徐有貞出為
福建叅政天順中岳正謫為欽州同知後復官止
於翰林供事皆不復再入

預閣務不居其職者蹇義以吏書夏原吉以戶書

朝夕備顧問擬旨然不與閣職

以他官兼大學士者如楊士奇以禮侍兼華蓋金
幼孜以戶侍兼武英陳山以戶侍兼謹身張瑛以
禮侍兼華蓋黃淮以通政使兼武英楊榮以太常
卿兼文淵徐有貞以武功伯兼華蓋

殿閣大學士自相兼者如陳循以華蓋兼文淵高
穀王文以謹身兼東閣胡廣楊榮金幼孜以文淵
兼翰林院學士其內閣諸殿次第自正統間始定

其兼銜次第自天順間始定然或以所兼保傅為
等級或以部分為後先如楊榮以太子少傅謹身
位少保黃淮武英下陳山無兼官以謹身位少保
黃淮太子少保金幼孜武英下少保黃淮太子少
保金幼孜以戶部尚書位少傅兵部楊士奇下金
幼孜又以戶部楊溥無兼官以禮部位工部楊榮
下王文以少保吏部位戶部陳循工部高穀少保
太子太傅下皆取所兼保傅為次序也張瑛以禮

部華蓋殿位戶部謹身陳山下此則以部分為次序也

內閣之職同於古相而所不同者主票擬而不身出與事如高公拱之兼掌吏部趙公貞吉之兼掌都察院孫公承宗兼掌兵部俱出而啓事入而調旨然惟高為首相二公皆非也事寄雖重然猶判然兩署獨天順間命徐公有貞考察方面嘉靖間命李公本分別尚書至大小九卿去留張公璉奉

敕肅清百寮韓公曠分別逆黨則政自閣出矣然
張公權掌都察院事李公因冢宰李公默得罪去
亦未可全謂之政出於閣也政出於閣者獨前武
功與後韓蒲州

內閣出為六卿者皆不帶閣銜即出將如楊公一
清自家起改兵部尚書左都御史總督三邊奉詔
而出閱九邊如翟公鑾亦改兵部尚書兼右都御
史唯華蓋殿大學士張公瑛以原官掌南京吏部

然詘之也文淵閣大學士孫公承宗則亦以原官
督理遼薊津登軍務自邊累官至少師中樞殿則
出將入相者本朝惟中山高陽二公而已然中山
帶相銜而實不與機務則又似高陽獨也

文淵閣未有言掌者徐武功有貞以勲臣領之遂
改為掌文淵閣王世貞譏之以謂文淵閣不可掌
也吏部左侍郎李賢為本部尚書兼翰林院學士
掌文淵閣事則又不止武功也又考解大紳縉入

閣居七人之首其繫銜亦曰掌文淵閣事則又不
始於武功也經筵大典初惟勲臣一人知之至李
文達賢始與勲臣並列至同知經筵閣臣亦不盡
與如景泰初江淵商輅與陳循高穀同在內閣陳
高二人同知經筵而江商二人止稱兼經筵官

票擬事有關兩部者必明標之三部以上始曰談
部至天啟而後無人知此典故矣每有一部而亦
稱談部

凡事有兩罪應處始曰從重如一事自有正議何
曰從重高新鄭每以此戒同列

票旨稱卿隆萬間惟二品得之而中亦有不能得
者天啓中凡腰犀者盡卿之考天順間祭酒吳節
以滿九年加從三品俸又三年以老請上曰國學
師傅正須老成卿宜懋稱無懇辭是四品而三品
亦卿矣朝廷優其人則稱之原無定例也

閣中有文淵閣印章玉箸篆凡封進詔草題奏揭

帖用之不得下諸司即下諸司以翰林院印行諸
司行內閣亦止稱翰林院

凡內閣題本用小揭帖楷書斜摺其本僉官銜則
發科抄行止稱臣某則不送科發抄

禁密文書一小匣在几上鑰之而不合大學士暮
出鑰其門匙懸門上恐禁中不時有宣索也舊規
不得舉火皆出食於外宣德時始令置廚庖會食
中堂

舊制輔臣在直辰入申出率以為常崇禎壬申後必二鼓始出及己卯後遂至四鼓始出間有徹夜者周宜興至始議輪一人宿精微科候傳票精微科九間在午門外西廡其南兵科直房也

舊制紅本到閣首輔票擬餘唯諾而已崇禎中御史倪元珙疏請分票其後本下即令中書分之首輔之權雖稍分然水火之端啓而中書之弊種種矣

孫高陽承宗曰閣體重首輔其圖事揆策主之首
輔當予陪末綴每見上傳首輔主裁語不及次首
輔即賢次輔以下豈無一得當上或間與首輔相
參差而兩意各主朝士之從意者隨分蓋自古分
合之議竟與國運相隨也

王司寇世貞曰閣臣於體至貴倨也視百司乃無
重相壓何以相稱焉其喜怒借上意故上不嫌逼
也威福間已意故下屏息也創自由六曹故難不

與也裁取以詔行故衆無敢訾也賢者當之不見
跡而治不肖者當之不及敗而亂此在人主擇矣
孫高陽承宗曰朝廷生殺予奪之權閣臣不顯操
而賢者得君以行其公遂能任生殺予奪而天下
治不肖者得君以行其私亦能竊生殺予奪而天
下亂故閣臣不必有其權而有其任

何良俊曰唐宋設官並置三省三省皆宰相也一
曰中書省二曰門下省三曰尚書省中書省則置

中書令而中書侍郎左丞右丞左右司郎中中書舍人皆其屬也門下省則古唐虞納言之官今之通政司是也省中則置僕射侍中門下侍郎中常侍武騎常侍散騎常侍給事中皆其屬也尚書省則置尚書而六曹皆設於部其屬則選部考功儀部駕部金部倉部比部虞衡水部之類皆設郎中員外郎是也凡朝廷有大政令則由門下省奏上發中書省看詳仍發門下省下尚書省施行故尚

書拜相則曰同中書門下平章事者是也當時政體互相鈐轄事權常分使門下尚書二省堅持官守不相阿縱則宰相之權初亦甚輕但看詳由於中書則主張庶事皆由其手其權安得不日漸隆重哉故唐宋時即有宰相如元載盧杞秦檜賈似道者蓋由此也近時各部之事皆聽命於閣下所不待言雖選曹有員缺亦送揭與閣然後注選此不知胡汪當國時有此事否夫威權日盛則謗議

日積謗議日積則禍患日深故自世宗以來宰相
未有能保全身名而去者

于文定慎行曰漢唐以來宰相之任往往起家郡
邑未有以文學侍從不出禁門而進宅揆任天下
之重者漢宣以蕭望之才任宰相欲試以政事乃
從少府左遷為馮翊曰所用皆更治民以考功故
試之於三輔此人主任相之法也許衡因論阿哈
瑪特之奸請解機務元世祖命舉一人自代衡曰用

人天子之大柄臣下汎論其賢否則可若授之以位則斷自宸衷不可使臣下有市恩之漸此相臣事主之法也

先正模範

票擬宜密

大學士劉健疏臣等仰見皇上委任腹心慎重機務開決壅蔽防閑漏泄之意易曰君不密則失臣臣不密則失身幾事不密則害成正為此也臣等

俱以庸篤謬承簡任輔導無狀口素有年聖諭下
臨捫心知感竊惟內閣之職所以承德弼違獻可
替否輔佐朝廷裁決政務與百司庶府職掌不同
中間事情誠為秘密在祖宗朝凡有諮訪論議或
親臨幸或召見便殿或奉天門或左順門屏開左
右造膝面諭以為常制臣等不暇遠引且如宣宗
章皇帝屢幸內閣御座所在至今臣等不敢中坐
英宗睿皇帝視朝將罷不時面召李賢憲宗純皇

帝亦常召李賢陳文彭時或遣司禮監太監如牛
玉懷恩二人到閣計議上有密旨則用御前之
寶封示下有章疏則用文淵閣印封進直至御前
開拆此臣等耳聞目見者也因循至今事體漸異
朝叅講讀之外不得復奉天顏雖司禮監太監亦
少至內閣朝廷有命令必傳之太監太監傳之管
文書官管文書官方傳至臣內閣有陳說必達之
管文書官管文書官達之太監太監乃達至御前

至於謄寫之職例委制敕房中書一二人臣等雖時常戒飭而經歷太多耳目太廣豈能保無漏泄宜有如皇上所諭者臣等自當滌慮省躬盡忠補過以副聖心但內閣文書多係機密凡事關得失利病職在輔導不敢阿順緘默未免有所陳奏緣臣等不習楷書字畫鈍拙恐不能一一自寫除事理重大者自行書寫封進以聽聖裁其餘仍乞容令中書代寫臣等亦當申嚴戒飭勿致漏泄皇上

若有諮議仍乞照祖宗故事或召臣等面諭或親賜御批數字封下或遣太監密傳聖意使臣等有所遵奉庶情得通達事無漏泄實為便益

代言不易

大學士張孚敬疏茲者內閣員缺臣已上請簡命節行足以報主道義可以服人者以為首臣以表百僚實以內閣之官居密勿之地任代言之責有難勝任故也臣連日思維又有不能自己於言者

敢復冒昧上請惟聖明垂察焉臣伏讀聖訓內一
款云自古三公論道六卿分職並不曾設立丞相
自秦始立丞相不踵旋而亡漢唐宋因之雖有賢
相然其間所用者多有小人專權亂政今我朝罷
丞相設五府六部都察院通政司大理寺等衙門
分理天下庶務彼此頡頏不敢相壓事皆朝廷總
之所以穩當至太宗皇帝始設內閣臣謹按太宗
皇帝實錄永樂二年九月上御右順門召翰林學

士解縉侍讀黃淮胡廣胡儼侍講楊榮楊士奇金
幼孜諭之曰朕即位以來爾七人朝夕相與共事
鮮離左右朕嘉爾等恭慎不懈故在宮中亦屢言
之然恒情保初易保終難朕固當存於心爾等亦
宜謹始如終庶幾君臣保全之美縉等叩頭言陛
下不以臣等淺陋過垂信任敢不勉勵圖報上喜
皆賜五品公服按此太宗皇帝時內閣止設翰林
學士及講讀編修等官備顧問而已及宣宗皇帝

朝楊榮楊士奇等始專任之有代言擬旨之責其官漸加至尚書師保後不復變也夫內閣有聲者稱三楊而已後楊榮曾孫業坐事抄沒家資鉅萬况其他乎故內閣設官太宗之時用之固未嘗不善及夫加以代言擬旨之責且任使多非其人遂至犯贓壞事臣歷數從來內閣之官鮮有能善終者蓋密勿之地易生嫌疑代言之責易招議論甚非君臣相保之道也古人謂人君勞於求賢而逸

於得人苟所得非其人焉反致君勞而實無益於國矣臣切惟人君之德莫大於明仁武仰惟皇上聖神邁古帝王三者之德無一不備誠無假於代言之官者也伏乞體念祖宗之制宜有所處或下廷臣集議以建國家久安長治之策以全君臣始終相保之道臣不勝恐懼願望之至

任用宜擇

大學士張孚敬疏臣伏讀聖諭朕思民間疾苦情

狀或未盡知則匹夫匹婦猶有不被其澤於此見
我皇上真存心天下加志窮民者也夫有君有臣
然後政舉今上有是君臣恐下無是臣也昔伊尹
以天下為己任思天下之民匹夫匹婦有不被堯
舜之澤者若已推而納之溝中惟成湯能用伊尹
故伊尹能相成湯夫人君以論相為職宰相以正
君為功伊尹不可得而見矣唐楊綰清儉簡素代
宗相之制下之日朝野相賀郭子儀方宴客聞之

減坐中聲樂五分之四京兆尹黎幹駟從甚盛即日聞之止存十騎中丞崔寬第舍宏侈亟毀之宋秦檜陰險深阻誣陷善類結納內侍伺上動靜高宗相之祖父孫三世皆領史職開門受賂富敵於國外國珍寶死猶及門一時忠臣良將誅鋤略盡其頑鈍無耻者率為之用卒致外裔內橫禍延國祚二宗任相得失明驗如此況皇上有堯舜知人之明而欲民被堯舜之澤者乎我太祖高皇帝懲

前代宰相專權不復設立而今之內閣猶其職也
皇上責以調元贊化可謂得任輔相之道矣臣不
知其宜何如為人也今之部院諸臣有志者難行
無志者聽令是部院乃為內閣之府庫矣今之監
司苞苴公行稱為常例簠簋不飭恬然成風是監
司又為部院之府庫矣撫字心勞指為拙政善事
上官率與薦名是郡縣又為監司之府庫矣司馬
光曰天之生財止有此數不在官則在民今在官

者恒多矣如之何民不窮且盜也夫人君之尊如
天明日月也威雷霆也近者皇上畏天修省責臣
下自陳待命之日莫不震疊既而無毀無譽黜陟
不聞旅進旅退幽明無別臣恐上下雷同非國家
之福也孔子曰事君敬其事而後其食今之事君
者其不為宮室之美妻妾之奉者鮮矣夫營巢養
子禽獸皆然不敬君事何以別乎孟軻氏告齊君
曰王欲行王政則盍反其本矣臣切惟皇上宣德

流化必自近始近必自內閣始夫人君用人固未嘗借才於異代者也今內閣擇其人焉責之以擇九卿九卿擇其人焉各責之以擇監司監司擇其人焉各責之以擇守令守令親民者也守令得人斯匹夫匹婦莫不被其澤矣不然則上下交征陪克在位皇上雖有憂民之心而澤民之政為遏絕如之何其可也

行政事宜

大學士高拱疏一祖宗舊規御門聽政凡各衙門
奏事俱是玉音親答以見政令出自主上臣下不
敢預也隆慶初閣臣擬令代答以致人心生玩甚
非事體昨皇上於勸進時荷蒙諭答天語莊嚴玉
音清亮諸臣無不忭仰當日即傳徧京城小民亦
無不懽悅則其所關係可知也若臨朝時不一親
答臣下必以為上不省理政令皆出他人之口豈
不解體合無今後令司禮監每日將談衙門應奏

事件開一小揭帖明寫某件不該答某件該答某件該某衙門知道及是知道了之類皇上御門時收入袖中待各官奏事取出一覽照件親答至臨時裁決如朝官數少奏請查究則答曰着該衙門查點其糾奏失儀者重則錦衣衛拏了次則法司提了問輕則饒他亦須親答如此則政令自然精彩可以繫屬人心伏乞聖裁

一祖宗舊規視朝回宮之後即奏事一次至中時

又奏一次內侍官先設御案請上文書即退出門外待御覽畢發內閣擬票此其常也至隆慶初年不知何故不設覽本御案司禮監官奏文書先帝止接在手中畧覽一二亦有全不覽者夫人君乃天下之主若不用心詳覽章奏則天下事務何由得知中間如有奸詭欺罔情弊何以照察今後乞命該監官查復舊規將內外一應章奏除通政司民本外其餘盡數呈覽覽畢送票票後再行呈覽

果係停當然後發行庶下情得通奸弊可弭而皇上亦得以通曉天下之事臣等又思各衙門題奏甚多難以通篇逐句細覽其中自有節要之法如各衙門題覆除前一段係原本之詞不必詳覽其擬議處分全在案呈到部以後一段乞命該監官每日將各本案呈到部去處夾一小紅紙籤皇上就從此覽起則其中情理及議處當與不當自然明白至於科道及各衙門條陳論劾本章則又須

全覽乃得其情伏乞聖裁

一事必面奏乃得盡其情理况皇上新政尤宜講究天下之事始得周知伏望於每二七日臨朝之後一御文華殿令臣等隨入叩見有當奏者就便陳奏無則叩頭而出此外若有緊急密切事情容臣等不時請見其開講之時臣等皆日侍左右有當奏者即於講後奏之如此則事得精詳情無壅蔽不惟睿聰日啟亦且權不下移而諸司之奉行

者當自謹畏不敢草率塞責矣伏乞聖裁

一事必議處停當乃可以有濟而服天下之心若不經議處必有差錯國朝設內閣之官看詳章奏擬旨蓋所以議處也今後伏望皇上將一應章奏俱發內閣看詳擬票上進若不當上意仍發內閣再詳擬上若或有未經發擬自內批者容臣等執奏明白方可施行庶事得停當而亦可免假借之弊其推陞庶官及各項陳乞與凡一應雜本近年

以來司禮監徑行批出以其不費處分而可徑行也然不知推陞不當還當駁正其或情事有欺詭理法有違犯字語有乖錯者還當懲處且內閣係看詳章奏之官而章奏乃有不至內閣者使該部不覆則內閣全然不知豈不失職今後伏望皇上命司禮監除民本外其餘一應章奏俱發內閣看詳庶事體歸一而奸弊亦無所逃矣伏乞聖裁

一凡官民本辭其有理者自當行其無理者自當

止具有奸欺情弊者自當懲治未有留中不出之
理且本既留中莫可稽考則不知果經御覽而留
之乎抑亦未經御覽而有留之者乎是示人以疑
也又或事係緊急密切而有留中者及至再陳豈
不有悞今後伏望皇上於凡一切本辭盡行發下
倘有未下者容原具本之人仍具原本請乞明旨
其通政司封進外來一應本章每當日將封進數
目開送該科備照倘有未下者科官奏討明白如

此庶事無關隔而亦可以遠內臣之嫌釋外臣之惑其於治理所關非細伏乞聖裁

治平要務

大學士張居正六事疏一省議論謂宜掃無用之虛詞求躬行之實效欲為一事須審之於初務求至當斷而行之如唐憲宗之討淮蔡百方沮之而不搖欲用一人須慎之於始既得其人則信而任之如魏文侯之用樂羊謗書盈篋而不動一切章

奏務從簡切是非可否宜明白直陳毋得彼此推諉徒託空言

一振紀綱謂情可順而不可徇法宜嚴而不宜猛
近來紀綱不肅模稜兩可謂之調停委曲遷就謂
之善處宜勅執法諸臣秉持公論振揚風紀刑賞
予奪一歸之公道政教號令必斷於宸衷以勵明
作之治

一重詔令近日朝廷詔旨多廢格不行抄到各部

概從停閣至於應勘應報奉旨下地方官輒視為
故紙有一事而數十年不完者文卷既多沉埋干
證半登鬼錄漏網孰問覆盆誰伸望勅下部院凡
奉旨事務數日之內即行題覆其地方合行覆奏
要嚴立期限從實查覈吏部即以此科課其能否
一覈名實器必試而後知利鈍馬必駕而後知良
駕今用人則不然稱人之才不必試之以事任之
以事不必更考其成惟魯少文者以無用見譏大

言無當者以虛聲竊譽倜儻伉直者以忤時難合
脂韋逢迎者以巧宦易容加以更調太繁遷轉太
速資格太拘毀譽失實或舍其職業出位是思或
條陳累牘而職守茫然願慎重名器愛惜爵賞用
人必考其終授人必求其當內外官三年六年考
吏部必實覈其稱職平常不稱職毋眩於愛憎毀
譽以臆為殿最

一固邦本方今風俗侈靡蠹敝橫生外之豪強兼

併賦役不均詭寄逋欠偏累小民內之官府造作
侵欺冒破假公濟私損上刻下凡此耗財病民之
大者若求其害而去之何必索之窮困之民以自
耗國家之元氣乎前項催督御史事完宜令回京
勿復再差其屯鹽各差亦當取回但責成撫按清
理可也如此則蠹害剷除民生甦而邦本固矣
一飭武備今議者皆曰兵不多食不足將帥不得
人臣謂三者不足患也夫兵不患少而患弱今軍

伍雖缺而糧籍具存若按籍清查隨宜募補着實
訓練何患無兵捐無用不急諸費併其財賦以撫
養戰士何患無財懸重賞以勸有功寬文法以伸
將權則忠勇之夫孰不思奮何患無將臣願皇上
先自治之圖屬任謀臣不求近功不忘遠畧選擇
邊吏團練鄉兵併守墩堡則無事可以守有事可
以戰矣臣又考之古禮祖宗故事俱有大閱之制
以習武事而戒不虞乞勅戎政大臣申嚴軍政間

請聖駕親臨較閱一以試將官之能否一以觀軍士之勇怯為磨勵勸懲亦轉弱為強之一機也疏入上曰覽卿奏具見謀國忠猷該部院看議以聞於是都御史王廷等及兵戶二部各覈議覆奏上令各如議遵行宗伯黃汝良稱張江陵此疏綜覈信必振積年委靡之頽風新一代精明之神氣隆慶萬歷間號太平實藉其謀國忠猷允稱救時賢輔矣

以去格主

大學士王家屏疏竊臣聞漢臣汲黯有云天子置公卿輔弼之臣寧令從諛承意陷主於不義乎且已在其位縱不愛身柰辱朝廷何每感斯言惕然內省竊自幸遭遇皇上明聖誠使朝政無缺帝德罔愆即將順不為從諛緘默無嫌承意也乃頃來九閭重閉五位深居宴安之毒是懷兢業之衷潛替郊廟不享而仁孝之念疎堂陛不交而君臣之

誼隔天災物異之警罔徹宸聽民生國計之憂不
闕聖慮皇上試省此心敬耶怠耶於治道得耶失
耶臣備員輔弼既不能婉導密規防君志未萌之
欲又不能明諍顯諫扶乾坤將壞之機曠職鰥官
久當退避所以逡巡未去徒以被恩高厚毫髮靡
酬庶幾殫竭愚忠漸次匡正乃今數月之間請朝
請不報請元旦受賀不報請大計臨朝不報臣犬
馬微誠不能感回天意已見於此矣至於升儲大

典九廟神靈共屬萬方想望惟殷卽冊立之期或可少待而豫教之舉委宜蚤圖科臣所言未為差謬皇上卽惡其瀆擾報罷足矣甚則罰俸足矣何至降調外任乎旨意一出遠近驚疑使道路之猜議橫生宮闈之讒構交作其於虧損聖德動搖國本非細故已也揭請寬宥未賜允俞且復遷怒申救諸臣概加譴謫臣誠不忍明主蒙拂諫之誚清朝有橫施之罰部科罹無妄之罪宗社蓄不測之

憂也循省虛庸終慙匡救若復依違保祿渙忍苟容正汲黯所謂從諛承意陷主不義貽辱朝廷者耳死且有餘僂焉伏乞聖恩亟賜罷歸俾全晚節第二疏項因科臣劉獻可等疏請豫教蒙旨降罰臣不揣輕鄙冒昧封還意事係宮闈不宜盛怒以損天親之愛言出臺省不宜峻斥以塞忠諫之門乃為聖德慮為國體慮非為獻可一人也揭請寬宥未蒙俞允方當退而補牘再瀝悃誠而科道諸

臣申救獻可者若鍾羽正張棟陳尚象鄒德泳等
又已得罪兩日之內嚴旨疊出或奪其俸或謫其
官方一旨調南京又一旨調外任方一旨降邊方
雜職又一旨削籍為民以至於孟養浩之廷杖一
百則更慘矣雷霆橫擊風日淒陰凡舉朝士紳遠
方選吏見者無不喪氣聞者無不摧心誠不意聖
哲之君有此舉動平明之世有此景況而原其釁
端由起則自臣揭救獻可始是臣惜諤諤之一士

而反累濟濟之羣英爭降罰之輕刑而反搆放逐
之重典善類之罪人清時之戾氣也用是自陳愚
戇疏乞罷歸庶幾感悟宸衷消融聖怒霎然開霽
赦宥諸臣使之復還舊官勉圖報稱則始雖因臣
咸累罹無妄之災終乃以過見原獲自新之路臣
雖退居壘畝尚可以一去謝諸臣耳何圖席藁累
日未奉處分詢之同官乃知為臣具揭伏奉聖旨
謂臣希名不遂托疾故症臣聞言惶悚負罪彌深

竊念名非臣之所希實非臣之敢棄臣所希者期
皇上為堯舜之主而臣為堯舜之臣此之謂名垂
千載有餘榮故足希也若犯顏色觸忌諱抗爭僨
事被譴罷歸此何名之可希乎必不希名將使臣
身處尊官家享厚祿主德愆違而莫之救正刑政
壞亂而罔克匡維此可謂不希名之臣矣而國家
將奚賴焉更使臣棄名不顧將逢迎為悅阿諛取
容雖許敬宗李林甫之奸佞無不可為是九廟神

靈所陰殛天下萬世所唾罵也不但得罪於劉獻
可鍾羽正諸臣而已豈當一日立於堯舜之朝哉
伏望皇上察臣慙愚本為禍始將臣特賜罷免以
示首事之懲仍召還降謫諸臣以釋株連之累庶
善類無枉羣情不搖臣感戴生成環草難報

第三疏臣頃以教科臣致干聖怒兩疏乞罷未奉
允俞忽蒙聖諭邇年以來喜事小臣狂肆不道逞
臆激擾姑以薄罰卿為佐治見此要名不義之徒

自宜調旨厝處緩詞解諫却乃逕駁御批故激朕
怒甚失禮體及朕怒起卿又不忍受假疾具疏又
言求去朕想卿真欲以此挾君廢政沽名逸卧豈
人臣之義哉且卿輔朕燮理贊襄佐治有年況今
國務多艱卿悠然高卧其心可安乎卿既有疾准
暫假數日即入閣辦事欽此臣謹焚香叩頭祇領
訖伏念犬馬猶能報主葵藿亦克傾陽物類且然
況臣受皇上作養生成之大德十年講幄六年政

府即天地父母未足比其恩慈雖粉骨碎身莫能
伸其報塞豈不知將順聖意鎮戢羣器可以全君
臣喜起之休養中外和平之福而止以冊立一事
爭議數年矣在皇上欽定冊期已有確然不易之
信則小臣數生激擾殊無帖然聽命之恭聖諭謂
其喜事逞臆此誠諸臣之罪不可掩也幸蒙薄罰
臣但當委曲調停從容緩解而封還御批致激聖
怒聖諭責臣甚失禮體此臣之罪臣亦不敢辭也

但皇子於皇上父子之親也冊立與豫教典禮之大也言涉至親不宜有怒事闡典禮不宜有怒臣與諸臣但知為宗社大計慮以盡言為效忠而已豈意其激皇上之怒哉使臣與諸臣預知皇上之怒必不敢封還內降逞臆激擾而所以敢激聒敢封還者正恃皇上之聖明無一言之不納皇上之寬大無一物之不容也及今數日之內嚴旨疊出斥逐紛然臣乃始錯愕銷魂自恨以為忠非素蓄

志未上通而謬襲引裾之跡期收補袞之功以致
一言不投萬事瓦裂譬之負轅之犢不可復乘敗
羣之羊所宜亟斥自不能一日安於其位而豈敢
文言求去挾君廢政哉伏荷天言切責謂沽名逸
卧大非人臣之義所宜且溫旨慰留念贊襄有年
當以國務之艱為慮華袞斧鉞總屬皇恩雨露雪
霜何非至教惟是孤忠獨立之身抱下愚不移之
疾俯循深痼恐非數日之假可痊望乞生全寬以

一朝之禡為幸

封還上諭

大學士王家屏疏今日文書官李相到閣蒙發下御史傅光宅本為撫鎮更調繁數事口傳聖意謂近來吏部用人遷轉太頻欲行降敕宣諭隨蒙文書官劉宣將下勅稿令臣等觀看臣等捧誦再三仰見皇上留心吏治加意官材申久任責成之規戒輕紛易更之擾誠不勝欽服第吏部之職名曰

銓衡其資序一定之中亦不能無斟酌轉移之法
或才望特著或人地相宜彼此互更意存器使容
有不得不然者竊見吏部尚書陸光祖老成練達
鯁介精嚴其一念進賢退不肖之心真有孜孜汲
汲夙夜匪懈者但其綜覈太銳故更置稍頻乃其
意則為公非為私任怨非任德也皇上即欲責使
慎重但於其回覆疏中出一嚴旨彼自當惕然警
省將順不遑若頒降綸音特加戒諭不惟志意銷

阻隲其任事之心將且體貌摧傷難居表率之地
其何以甄叙衆職而壓服人心也伏望皇上念係
大寮姑寬嚴督恕其既往之咎開其補過之門庶
幾崇重天言不至於褻玩保全國體共荷其優容
矣所有敕諭一道乞准停止

舉賢報効

大學士沈鯉疏臣往伏田間蒙非常知遇召以弓
旌而處之輔弼之地迄今四載無能有涓埃報効

私心常用為憂已而求之古人則公叔文子之臣
大夫僕與文子同升諸公而孔子稱其為文臧武
仲知柳下惠之賢而不與立而孔子譏其竊位乃
知閭臣之所為盡職者不在乎自賢自能而在舉
天下之賢以為賢舉天下之能以為能而以人事
君然後為大不但以一身區區也臣等於是始交
相勸勉乃各以盈尺之幅摺為手簡納之懷袖凡
有聞四方之賢者能者輒濡毫而識之用比於昔

人之夾袋以備遺忘積之既久遂以盈幅方擬諏
吉齋沐具奏以聞用比於芹曝之獻尋又思臣等
各兩耳兩目爾今主上方且明四目達四聰豐蔀
幽隱無不畢照卷阿車馬無不具陳何需此道聽
塗說為乃遂削其牘而不敢奏而但請命於上敕
下該部及九卿科道各舉所知亦各務以人事君
如所舉而與臣等之所私擬者無不符合也則臣
等之言已行矣雖削牘可也或亦有意見稍殊大

同小異則以相叅酌而補苴罅漏以共成斯舉亦
可也蓋臣等以一念之公心而付之舉朝之公論
夫是以不敢先亦不敢後也抑臣等之所以為此
者豈目前是為亦竊有深長之慮焉何以故為人
才長養之難也為遺大投艱之不易也為戡亂反
治之不可無人也故為是私憂過計也請一一熟
慮之聖神在御菁莪棫樸作人於三十四載之間
而後有雲蒸豹變如斯之盛向惟其用之不早而

使之沉淪於山阿海澨蓬門華巷之中乃多化為異物而不得其半臂之力今之存而未泯者十之二三耳若更不及時賜環漸以漸滅於作養人才之謂何蓋樹人猶樹木當種樹之初其殷勤撫摩培灌者拱把柔條也何望之甚殷也豈既成叅天之材而棄為溝中之斷乎亦殊覺前勞之可念矣故臣等為是惜何言乎遺大投艱之不易也一榱一桷可隨地而求之亦可以隨手而得之彼巍乎

隆棟如今構三殿之材者其安可驟得乎蓋必其
險阻艱難無不閱歷而後能增益其德慧此在千
百中一二也故以為遺大投艱之不易也然此猶
論其常也自古及今事變之高高下下驚心駭目
者安有定形其芟薙荆榛蕩滌邪穢廓陰暄而耀
光明者亦何代蔑有也故在唐則狄仁傑薦五王
在宋則王旦薦寇準乃卒能定難呼吸成旋乾轉
坤之烈假令其臨渴而掘井亡羊而補牢亦何能

有濟於事故臣等區區愚見以為世有一奇偉非常可排難解紛之人當及無所可用之時布在周行備一旦緩急之用乃不致臨時無措此戡亂反治之不可無人也抑又有不止於此者賢才不在朝則在野其所在有多寡則國家之氣象亦自有不同者故野無遺賢而史必書之曰慶歷之盛君子滿朝即詩書所稱濟濟師師不加於此矣不亦榮乎其不然者則書曰賢才徧野將百世而下有

遺議矣夫由前三事則關係在當時由後一說則是非在來世皆臣等遠慮也故不敢不盡焉雖然此對君公言也尤竊有私願於會舉諸臣者亦不敢不盡其愚威福人主之大柄也人臣其誰敢干之苟當會舉時而稍着一意澄汰不公則其所舉者即為市恩市恩與作福一意也科道官得指名糾劾以防冒濫亦更宜仰體聖心與天地同廣大與父母同恩勤即先年放逐諸臣有偶觸詿誤而

困衡已深者自不妨從衆公舉一體叙錄於以昭王道蕩平無作好惡亦卓絕古今一事也

國是宜定

大學士葉向高疏臣惟天下之治亂必有其形治者非豐亨豫大之謂也朝政清明庶官輯睦即謂之治亂者非禍變擾攘之謂也法紀凌遲人心鶩競即謂之亂皇上視今之天下治耶亂耶臣不敢言其他即如近建言諸臣意見稍分門戶遂立藩

籬既樹而隙罅彌開始而臭味繼而參商又繼而水火矣始而旁觀繼而佐鬪又繼而操戈矣株連蔓引枝節橫生暮跖朝夷好莠自口遂使盡言無諱之朝反憂白馬清流之禍一何諸臣之失計也夫天下議論有一時而定者有一時未必定而俟之日後則又自定者有爭辨而明者有愈辨不明而置之不辨則又自明者揚湯止沸不如去薪可謂善喻諸臣何不思乎然此為諸臣言耳朝廷者

臣下之紀綱威令所自出也故言一事則必決一事之從違毋因一事而滋盈庭之議言一人則必斷一人之用舍毋因一人而開羣枉之門今皇上一切涵容無所可否當去不去當留不留當斷決不斷決聚之使爭養之使闕奏牘日多事端日起職此之故夫人主之明如日月威如雷霆也日月之明以其常運雷霆之威以其迅速非運非速則毋乃自傷其明而威幾頓乎自古忠邪不分朋黨

為害多見於叔季之世庸愚之君今聖明在御乾
綱獨攬豈容有此誠宜盡發諸臣之疏勅下部院
評其是非曲直以聽聖裁言當則行不當則止中
有顛倒謬戾之甚者量處一二以警將來則人心
振肅議論分明而朝寧之間廓然有天清地寧之
景象矣皇上亦何憚而不為乎臣嘗為相知者言
天下事非一家私議自譽為君子無益也天下後
世以為君子則真君子矣見詆為小人未傷也天

下後世以為小人則真小人矣小人君子界限甚嚴公論甚晰自古及今未之能逃念及於此將客氣自消而爭論自息矣此又臣一得之愚而欲為諸臣忠告者臣與諸臣比肩事主無嫌無疑亦無一毫偏護私意但目擊世界紛紜至此而處輔弼之任默無一言安所逃責故敢直陳其愚惟聖明少加意焉

遇災引罪

崇禎十六年二月大學士公疏臣等因風霾具疏
引罪適蒙發下欽奉御批連日風霾大作朕心悚
惕靡寧深自省察總因朕寡德所致卿等弘謨蓋
志以佐不逮朕深切倚賴不必合詞引咎至於教
誨以至誠感格等語尤覘惻忱朕謹凜天戒敢懈
誠修益望輔弼大臣多方匡救其折轉一應扼擊
盡殲功罪賞罰屢旨已詳行間文武諸臣俱著殫
智竭力奮勵掃除必期成功該部即日馳飭欽此

臣等叩頭恭頌不勝感激不勝惶悚竊惟我皇上
敬天之威時保不懈錫民之福歲省惟勤昨者兆
示風霾咎惟臣下而乃以悚惕省察嚴洪範五事
之徵以匡救誠修謹春官十煇之戒實與我聖祖
露坐郊壇顧諟雷斧之意先後同符在昔周宣王
雲漢示警南征北討赫然中興彼猶中主也矧以
堯舜之資而當天心仁愛之會滅敵平寇日可俟
矣所愧臣等才識疎庸罪愆叢積若律以輔理無

能之效正當在災異策免之條而猶過荷矜原暫
稽恩譴俯循衾影彌切淵冰統俟兵事稍寧再圖
合詞控請其行間督撫諸臣復經批諭嚴飭當益
祇遵臨事奮勵成功以仰副宸筭除臣等另報名
廷謝外謹先具揭回奏恭謝伏祈聖鑒臣等不勝
激切悚息之至崇禎十六年三月二十六日晚上
二十七日奉御批覽先生每奏朕知道了朕警凜
天威勉法祖德此揭奏裨益良深并前疏著命所

司書於殿壁時存警戒不虛先生每訓誨至意談
衙門知道

閣員宜推


吏部尚書陸光祖疏本月十五日申時伏蒙皇上
召臣光祖與志臯至會極門傳奉敕諭初未知為
何事恭捧到於朝房然後知為陞趙志臯禮部尚
書張位吏部左侍郎俱入閣辦事始臣等微聞申
時行等密薦二臣今乃果然臣等素知二臣之賢

士論稱為正人君子望其柄用今皇上信納閣臣之言用之輔理良協輿情臣不勝欣躍但事關職掌有不容不言者夫爵人於朝與衆共之祖宗定制凡大臣員缺吏部與九卿會推請旨簡用至推吏兵二部尚書各邊總督及內閣大臣則九卿之外復益以六科十三道蓋其任愈重則舉愈當公詢謀僉同方敢推用實所以廣忠集衆而杜偏聽之奸絕阿私之患也自大學士張居正用事閣臣

進用始有不由會推者意在市恩蔑棄成法天下共言其非矣今時行等所薦固為得人即使會官廷推二臣資望安知不在所推數中奚庸私薦哉臣愚以為會推大典祖制決不可廢私薦內降其端決不可啓伏望皇上俯納臣言以後閣臣員缺仍勅吏部九卿科道官照例會推疏名以請廣衆大廷之中孰敢蔽賢亦孰敢私所厚庶朝廷有大公至正之體而所舉之臣亦有光榮得以殫心而

任事矣若一聽之獨舉密薦誠恐異日徇私植黨
之禍殆有不可勝言者臣待罪銓衡不敢不為國
家存深長之慮冒昧上言伏望聖明裁奪謹題請
旨萬歷十九年九月十八日具題二十日奉聖旨
新簡閣臣你每既說士論稱服元輔所薦足見至
公今次斷自朕心原不為例以後還着會推按爵
人於朝所以示公也自傳奉行而官品亂矣當時
閣員缺公議起王山陰閣中恐妨已遂行揭薦蘭

溪不足言而礦稅之禍實自新建開之則平湖一
疏豈可少乎



春明夢餘錄卷二十三